

**Khairy berbeza dengan Pak Lah dalam isu Utusan Malaysia  
Malaysian Insider  
Aug 25 , 2013  
OLEH MOHD FARHAN DARWIS**

Khairy Jamaluddin Abu Bakar bukan seperti bapa mertuanya, sekurang-kurangnya berkenaan tindakan yang perlu dilakukan kerajaan dalam menyemak Utusan Malaysia.

Dalam temubual bukunya, Tun Abdullah Ahmad Badawi menjelaskan beliau pernah memberi amaran kepada editor akhbar milik Umno itu ketika laporannya melangkaui batasan dan menyemarakkan isu perkauman dan tidak seharusnya meminta pertolongan Putrajaya jika disabitkan kesalahan menghasut.

Namun menantunya, Menteri Belia dan Sukan mengambil pendirian berbeza ketika ditanya dalam forum Perdana Menteri Datuk Seri Najib Razak yang melihat tajuk Utusan "Apa Lagi Cina Mahu" sebagai ancaman.

Khairy (gambar) berkata, kenyataan "Tsunami Cina" yang dikeluarkan Najib ketika pengumuman keputusan Pilihan Raya 2013 hanyalah pemerhatian dan beliau tidak menyalahkan mana-mana etnik tertentu.

"Sepanjang pengetahuan perdana menteri, beliau menyatakan fakta yang melihatkan pengundi Cina yang tidak menyokong BN.

"Kenyataannya itu adalah berdasarkan pemerhatian dan tidak menyalahkan mana-mana komuniti ... kenyataan Utusan dan kedudukan perdana menteri adalah sesuatu yang berbeza," katanya dipetik portal Malaysiakini.

Ketua Pemuda Umno itu berkata demikian ketika menjawab pertanyaan mahasiswa dalam satu forum bahawa Najib gagal mengambil tindakan terhadap laporan muka hadapan akhbar berkenaan.

"Perdana menteri komited dengan pendekatan 1Malaysia. Beliau boleh berkata tengok kita tidak mendapat sokongan Cina selepas pilihan raya, jadi lupakan 1Malaysia dan fokus kepada mereka yang menyokong kita.

"Namun beliau tetap konsisten untuk mengekalkan polisi inklusif berkenaan secara konsisten," kata Khairy.

Beliau menjelaskan tajuk Utusan itu adalah satu kesalahan, namun ia bukanlah atas kebenaran kerajaan.

Dalam buku bertajuk "Awakening: The Abdullah Badawi Years in Malaysia", Abdullah membuat kenyataan bagaimana beliau menguruskan Utusan dengan cara berbeza.

Merujuk kepada pelantikannya, Pak Lah berkata "saya tidak mencampuri tugas mereka kerana saya percaya mereka mempunyai tugas professional dan saya memberi kebenaran. Namun bila mereka melanggarnya, membangkitkan isu perkauman dan agama, saya akan memberi amaran."

Abdullah bagaimanapun berkata satu panggilan telefon akan menakutkan akhbar berkenaan dan selepas itu tiada lagi artikel yang sensitif dikeluarkan. – 25 Ogos, 2013.

Hakcipta © 2013 The Malaysian Insider

Source:

<http://www.themalaysianinsider.com/bahasa/article/khairy-berbeza-dengan-pak-lah-dalam-isu-utusan-malaysia>